



SLUŽBENE NOVINE

KANTONA SARAJEVO

Godina XXVII - Broj 19

Četvrtak, 12. 5. 2022. godine
SARAJEVO

ISSN 1512-7052

KANTON SARAJEVO

Skupština Kantona Sarajevo

Na osnovu člana 13. tačka i), člana 14. stav (2) i člana 18. tačka b) Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na 52. Radnoj sjednici održanoj dana 09.05.2022. godine, donijela je

ZAKON

O IZMJENAMA I DOPUNAMA ZAKONA O ŠUMAMA KANTONA SARAJEVO

Član 1.

(Izmjena člana 3.)

U Zakonu o šumama Kantona Sarajevo ("Službene novine Kantona Sarajevo", br. 5/13 i 10/21) član 3. mijenja se i glasi:

"Član 3.

(Definicije pojmova)

Pojmovi koji se koriste u ovom zakonu imaju sljedeća značenja:

- biološka reprodukcija šuma je skup biotehničkih mjera i drugih poslova kojima se obezbjeđuje stalna obnova šuma i povećanje površina šuma i unapređenje stanja šuma u pogledu veličine i kvaliteta zaliha i njihove proizvodnosti,
- biodiverzitet ili biološka raznovrsnost je sveukupnost svih živih organizama koji su sastavni dijelovi ekoloških sistema, a uključuje raznolikost unutar vrsta, između vrsta, životnih zajednica, te raznolikost između ekoloških sistema,
- certificiranje gospodarenja šumskim resursima podrazumijeva dobrovoljnu proceduru u kojoj nezavisno tijelo za certificiranje izdaje pisanu potvrdu-certifikat korisniku šuma da je gospodarenje šumama koje se provodi na određenom šumskom području usklađeno sa unaprijed definiranim standardima,
- čista sječa znači sječu svih ili praktično svih stabala u sastojini,
- doznaka podrazumijeva odabiranje, obilježavanje i evidentiranje stabala za sječu,

- divljač su posebnim zakonom određene životinjske vrste koje slobodno žive u prirodi,
- etat je planirani obim sječa u skladu sa principima kontinuiteta gospodarenja i sastavni je dio plana sječa unutar usvojene šumsko privredne osnove,
- funkcije šuma su:
 - ekološke: zaštita biodiverziteta šumskih ekosistema, zaštita staništa, zaštita zemljišta, zaštita voda, klimatska, uključujući ulogu šuma u vezivanju ugljika iz zraka,
 - socijalne: nauka, istraživanje, obrazovanje, odbrana, zaštita naselja, objekata i infrastrukture, turizam, rekreacija, pejzažno-estetske funkcije, istorijske funkcije, umjetnost, duhovno-spiritualne funkcije i unaprijeđenje kvaliteta življenja stanovništva,
 - ekonomske: prihod od proizvodnje drveta, nedravnih šumskih proizvoda i reprodukcijonog materijala.

Ekološke, socijalne i ekonomske funkcije šuma vrši istodobno i niti jedna od njih se ne može isključiti niti neutralizirati u korist druge, ali se zato pojedine funkcije šume mogu odgovarajućim gospodarskim mjerama potpomagati i optimizirati u skladu sa postavljenim ciljem namjene šume,

- gazdinska klasa je skup šumskih sastojina (odsjeka) istih ili vrlo sličnih karakteristika u ekološkom, proizvodnom i strukturno-razvojnog pogledu unutar jednog šumsko privrednog područja,
- gospodarenje šumama obuhvata planiranje, uzgajanje, zaštitu i korištenje šuma i šumskog zemljišta u skladu sa odredbama šumsko privredne osnove,
- integralna zaštita šuma predstavlja multidisciplinarni koncept koji zagovara odgovornost svih subjekata koji koriste prirodne resurse: političkih (upravljanje šumama), stručnih (gospodarenje šumama) i građana (podizanje svijesti). Integralna zaštita se tako može sagledavati sa dva aspekta: u širem smislu (obaveze

- sвих subjekata društva) i u užem smislu (obaveze samo djelatnosti šumarstva),
- l) izvođač radova u šumarstvu je fizičko ili pravno lice koje je registrovano za izvođenje radova u šumarstvu,
- m) korisnik šuma je Kantonalno javno preduzeće za gospodarenje državnim šumama "Sarajevo-šume" d.o.o. Sarajevo (u daljem tekstu: KJP "Sarajevo-šume"), Kantonalna javna ustanova za zaštićena prirodna područja Kantona Sarajevo (u daljem tekstu: KJU za zaštićena područja), i pravna i fizička lica koja su upisana kao vlasnici šuma,
- n) korištenje šume obuhvata sječu i transport drveta, sabiranje nedrvnih šumskih proizvoda uključujući i prodaju šumskih drvnih sortimenata i nedrvnih šumskih proizvoda,
- o) krčenje šume je trajno uklanjanje šumskog drveća sa određene površine ili izvođenje drugih radova na šumskom zemljištu, u cilju promjene namjene korištenja zemljišta, a ne smatra se krčenjem sječa i uklanjanje stabala radi stvaranja prostora u cilju izgradnje objekata u šumi i na šumskom zemljištu potrebnih za gospodarenje šumama kao i za prehranu i uzgoj divljači,
- p) otvorena vatra je svaka zapaljena vatra izvan zatvorenog objekta koji je pod krovom i zatvorenim ognjištem,
- r) pod otpadom se podrazumijevaju organske i neorganske tvari koje se odlažu u šumi i na šumskom zemljištu, a ne smatraju se otpadom ostaci drveta iza aktivnosti gospodarenja šumama kao i dijelovi animalnog porijekla koji su izneseni na hranilišta u cilju prihrane divljači,
- s) pravno lice za obavljanje stručnih poslova u privatnim šumama je privredno društvo registrovano kod nadležnog suda za poslove šumarstva, koje posjeduje odobrenje Ministarstva privrede Kantona Sarajevo (u daljem tekstu: Ministarstvo),
- t) prirast je povećanje dimenzije stabla u određenom vremenskom periodu,
- u) površinske vode su stalni i povremeni površinski vodeni tokovi, te stajaće vode,
- v) prava trećih lica na šume su prava na korištenje šumskih proizvoda koja postoje u skladu sa obligacionim pravom i upisana su u zemljišnoj knjizi,
- z) pustošenje šuma podrazumijeva narušavanje stabilnosti šuma, podbjeljivanje stabala, veće oštećivanje stabala i njihovih dijelova, veće uništavanje i oštećivanje podmlatka, kao i svaka druga radnja kojom se slabi prinosa snaga šume i šumskog zemljišta, ugrožava opstanak šume i njihove funkcije,
- aa) sanitarna sječa znači sječu oboljelih, insektima napadnutih, oštećenih ili izvaljenih stabala,
- bb) sastojina je dio šume koji se od ostalih dijelova šume razlikuje po vrsti drveća, dobi i stadiju razvitka, uzgojnom obliku, načinu postanka i načinu gospodarenja,
- cc) šumska infrastruktura su šumski putevi, stalne šumske vlake, stalne žičare i druge šumske komunikacije i kapaciteti u šumama koji su namijenjeni za gospodarenje šumama,
- dd) šumski proizvodi su svi proizvodi šuma i šumskog zemljišta, uključujući, ali ne ograničavajući se na:
- 1) šumsko drveće i grmlje,
 - 2) šumsku biomasu,
 - 3) cvjetove, sjeme, koštunjicavo voće, bobičaste i druge plodove, koru drveta, korijen, šišarke i plodove druge vegetacije unutar šume,
 - 4) ljekovito, aromatsko i jestivo bilje i druge biljke i njihove djelove,
 - 5) gljive,
 - 6) biljni sok i smola,
 - 7) listinac,
 - 8) travnati ili pašnjački prekrivač,
 - 9) treset, zemlju, pijesak, šljunak i kamen sa površine zemlje,
 - 10) životinje koje obitavaju u šumi izuzev divljači,
 - 11) nedrvni proizvodi iz tač. 2. do 10) predstavljaju dobra biološkog porijekla, osim drveta, kao i usluge koje proizilaze iz šume i šumskog zemljišta,
- ee) šumski putevi su putevi sa pratećom infrastrukturom, koji su namijenjeni za prijevoz šumskih proizvoda i sav saobraćaj vezan za gospodarenje šumama, a vlake nisu šumski putevi,
- ff) šumski reprodukcioni materijal je:
- 1) sjeme: šišarke, plodovi i sjeme namijenjeno za proizvodnju biljaka,
 - 2) dijelovi biljaka: grančice i snopovi rezanih grana namijenjeni za proizvodnju biljaka,
 - 3) mlade biljke: biljke uzgojene iz sjemena ili dijelova biljke, uključujući i mlade biljke iz prirodnog podmlatka,
- gg) šumsko privredno područje je najmanja trajna prostorna uređajna jedinica šuma i šumskog zemljišta na kome se obezbjeđuje trajnost gospodarenja i obuhvata šume u državnom vlasništvu, a u geografskom, prometnom, ekološkom i ekonomskom pogledu predstavlja jednu zaokruženu cjelinu,
- hh) šumsko privredna osnova je dugoročni planski akt kojim se definiše reguliše gospodarenje šumama na principu kontinuiteta gospodarenja, polifunkcionalnosti i ekonomičnosti unutar jednog šumsko privrednog područja za državne šume ili općine za privatne šume, te sadrži podatke o stanju šuma i šumskih zemljišta, kao i planove koji će se realizovati u šumama u uređajnom periodu,
- ii) šumsko uzgojnim mjerama obnove, u smislu ovog zakona se smatraju sve mjere i aktivnosti koje doprinose osnivanju novih sastojina u šumi njihovoj njezi, poboljšanju njihove stabilnosti, raznolikosti ili kvaliteta,
- jj) šumsko uzgojne mjere uključuju:
- 1) mjere za obnovu šuma, odnosno za stvaranje novih sastojina,
 - 2) njegu šuma u mladim razvojnim fazama, uključujući proredu mlađih sastojina,

- 3) specijalnu njegu mladih faza u prebornim šumama i drugim raznolikim šumama, izdanačkim šumama, kao i njegu rubova šuma,
- 4) rekonstrukciju i konverziju izdanačkih šuma, šikara i šibljaka,
- kk) šume visoke zaštitne vrijednosti su šumska područja koja sadrže jedinstvene, kritične i ugrožene okolinske atribute (vrijednosti), te na taj način osiguravaju važne ekosistemske usluge i sociološko-kulturološke funkcije, na globalnom, regionalnom ili lokalnom nivou, koje je potrebno zaštititi i unaprijediti odgovarajućim mjerama upravljanja i gospodarenja, kroz učesnički pristup svih zainteresiranih strana,
- ll) trajnost gospodarenja (održivo gospodarenje) šumama podrazumijeva korištenje proizvoda šuma i upotrebu šuma i šumskih zemljišta na način i sa intenzitetom koji će očuvati njihov biodiverzitet, proizvodnost, sposobnost obnavljanja, vitalnost te povećati njihov potencijal da sada i u budućnosti obavljaju značajne ekološke, ekonomske i socijalne funkcije na lokalnom i globalnom nivou, a da se pri tom ne ugrozi funkcionisanje drugih ekosistema,
- mm) upravljanje šumama i šumskim zemljištima podrazumijeva administrativno-upravne poslove Ministarstva i Uprave za šumarstvo u sastavu Ministarstva (u daljem tekstu: Uprava za šumarstvo), koji se sastoje od kreiranja jedinstvene šumarske politike, dugoročnog (strateškog) i srednjoročnog planiranja, kontrole i stručnog nadzora korištenja šuma i šumskog zemljišta u cilju očuvanja i unaprjeđenja trajnosti gospodarenja šumama,
- nn) uređajni period je vremenski period za koji se donosi šumsko privredna osnova i traje 10 godina,
- oo) vlasnici šume su pravna i/ili fizička lica koja su na zakonit način stekla pravo vlasništva nad šumom i šumskim zemljištem,
- pp) zaštita šuma je skup mjera i aktivnosti koje su dužni preduzimati vlasnici i korisnici koji gospodare šumama radi zaštite šuma od požara, drugih elementarnih nepogoda, štetnih organizama, bolesti i štetnih antropogenih uticaja."
- Član 2.
(Izmjene i dopuna člana 6.)
- (1) U članu 6. st. (1) i (3) mijenjaju se i glase:
"(1) Kantonalni šumsko-razvojni plan izrađuje se za period od 30 godina sa revizijom svakih deset godina za sve šume i šumsko zemljište, bez obzira na vlasništvo s ciljem da se obezbijedi trajnost gospodarenja šumama na području Kantona.
(3) Kantonalni šumsko-razvojni plan sadrži najmanje sljedeće:
a) analizu stanja šuma i šumskih zemljišta,
b) analizu korištenja šuma,
c) smjernice za gospodarenje šumama,
d) stanje lovnog gospodarstva i smjernice za unapređenje,
e) program prioriteta bioloških i tehničkih investicija."
(2) St. (4) i (5) brišu se.
(3) Iza stava (8) dodaje se novi stav (9) koji glasi:
- "(9) Ministar donosi pravilnik kojim se propisuju elementi izrade, sadržaja i minimalnih uslova za izradu i donošenje kantonalnog šumsko-razvojnog plana."
Član 3.
(Izmjena i dopuna člana 11.)
(1) U članu 11. st. (1) mijenja se i glasi:
"(1) Planovi šumsko privredne osnove se izvršavaju, izradom i realizacijom godišnjih planova koji sadrže prosječno jednu desetinu svih planiranih radova po osnovi."
(2) Iza stava (5) dodaje se novi stav (6) koji glasi:
"(6) Korisnik šuma u prvoj godini uređajnog perioda, izrađuje desetogodišnji preliminarni plan dinamike realizacije sječa, za svaku godinu posebno, po šumskim odjelima i sastojinama."
Član 4.
(Izmjena člana 12.)
Član 12. mijenja se i glasi:
"Član 12.
(Projekat za izvođenje)
(1) Projekat za izvođenje se izrađuje za uređajnu jedinicu - odjel za državne šume i katastarsku parcelu/parcele za privatne šume u skladu sa godišnjim planom realizacije šumsko privredne osnove. Odredbe projekta za izvođenje su obavezne.
(2) Projekat za izvođenje sadrži planove svih potrebnih biotehničkih mjera u okviru pojedinih sastojina unutar odjela, a u skladu sa predviđenim ciljevima gospodarenja šumsko privrednom osnovom po obimu, mjestu i vremenu izvođenja.
(3) Zabranjena je sječa i oštećivanje izdvojenih i obilježenih habitatnih stabala ili korištenje njihove drvene mase na bilo koji način.
(4) Radovi predviđeni projektom treba da se završe u roku od dvije godine od dana njegovog donošenja.
(5) Projekat za izvođenje mogu izrađivati diplomirani inženjeri šumarstva/magistri šumarstva sa najmanje dvije godine radnog staža u struci. Korisnik šuma, odnosno privatni vlasnik šume, određuje lice za izradu projekta.
(6) Projekat za izvođenje donosi korisnik šuma za državne šume, a za privatne šume Uprava za šumarstvo ili pravno lice za obavljanje stručnih poslova u privatnim šumama.
(7) Pravno lice za obavljanje stručnih poslova u privatnim šumama obavezno treba da:
a) posjeduje registraciju nadležnog suda sa upisanom djelatnošću u oblasti šumarstva,
b) ima uposlenog jednog diplomiranog inženjera šumarstva/magistra šumarstva, sa najmanje tri godine radnog staža u struci.
(8) Ministarstvo na osnovu dokumentacije iz stava (7) ovog člana izdaje saglasnost pravnom licu za obavljanje stručnih poslova u privatnim šumama.
(9) Izuzeto od stava (1) ovog člana projekat za izvođenje može se izrađivati za više odjela u jednom slivu ako sječa i izrada sanitarnih užitaka ne prelazi više od 100 m³ po jednom odjelu, ali se podaci o obimu sanitarnih sječa moraju prikazati po pojedinim odjelima i sastojinama.
(10) Za privatne šume obavezno se rade projekti za šumsko-uzgojne radove kao i za sječu ako je godišnji obim sječa veći od 100 m³ po vlasniku.
(11) Korisnik šuma donosi Odluku o imenovanju odgovornog lica za realizaciju projekta, diplomiranog inženjera

- šumarstva/magistra šumarstva sa najmanje tri godine radnog staža u struci, koji je odgovoran za stručno izvođenje radova po projektu za izvođenje i ista se prilaže uz projekat.
- (12) Projekat za izvođenje ima trajan karakter i čuva se u arhivi korisnika šuma, Uprave za šumarstvo ili pravnog lica za obavljanje stručnih poslova u privatnim šumama.
- (13) Korisnik šuma, Uprava za šumarstvo ili pravno lice za obavljanje stručnih poslova u privatnim šumama dužni su da vode registar izrađenih i donesenih projekata za izvođenje i da sve izvršene radove po projektu evidentiraju u evidencije iz člana 46. stav (10) ovog zakona.
- (14) Ministar donosi pravilnik kojim se propisuje sadržaj i postupak donošenja projekta za izvođenje gospodarenja šumama."

Član 5.

(Izmjene člana 13.)

- (1) U članu 13. st. (3) i (9) mijenjaju se i glase:
- "(3) Doznaku stabala za sječu u državnim šumama može vršiti diplomirani inženjer šumarstva/magistar šumarstva, sa najmanje jednom godinom radnog staža u struci kojeg odredi korisnik šuma. Izuzetno od ovog stava doznaku stabala za sanitarnu sječu i doznaku stabala u izdanačkim šumama može vršiti bachelor/bakalaureat šumarstva, sa najmanje jednom godinom radnog staža u struci, a kojeg odredi korisnik šuma.
- (9) Doznaku stabala ili obilježavanje površina za sječu u privatnim šumama može vršiti diplomirani inženjer šumarstva/magistar šumarstva sa najmanje jednom godinom radnog staža u struci, a kojeg rješenjem odredi Uprava za šumarstvo ili pravno lice za obavljanje stručnih poslova u privatnim šumama. Izuzetno od ovog stava doznaku stabala za sanitarnu sječu i doznaku stabala u izdanačkim šumama, u privatnim šumama može vršiti bachelor/bakalaureat šumarstva, sa najmanje jednom godinom radnog staža u struci, a koga rješenjem odredi Uprava za šumarstvo ili pravno lice za obavljanje stručnih poslova u privatnim šumama."
- (2) Iza stava (9) dodaje se novi stav (10) koji glasi:
- "(10) Zabranjuje se vršenje doznake stabala u šumi u kojoj nisu evidentirani, obilježeni i obrojčeni panjevi koji potiču od bespravnih sječa."
- (3) Dosadašnji stav (10) postaje stav (11).

Član 6.

(Izmjena člana 15.)

Član 15. mijenja se i glasi:

"Član 15.

(Biološka reprodukcija šuma)

- (1) Korisnik državnih šuma i vlasnik/predstavnik vlasnika za privatne šume dužni su izvršavati poslove biološke reprodukcije šuma u minimalnom obimu koji je predviđen šumsko privrednom osnovom.
- (2) Prosta biološka reprodukcija je skup biotehničkih mjera i drugih poslova kojima se obezbjeđuje stalna obnova šuma, a što podrazumijeva održavanje površina, veličine i kvaliteta zaliha drvene mase, kao i infrastrukture za trajno gospodarenje šumama na postojećem nivou.
- (3) Pod prostom biološkom reprodukcijom podrazumijeva se:
- zaštita šuma,
 - izrada projekata za izvođenje,

- priprema zemljišta za obnovu šuma,
 - pošumljavanje i sjetva sjemenom šumskog zemljišta,
 - pošumljavanje površina nastalih nakon čistih sječa,
 - odabiranje i doznaku stabala za sječu,
 - njega i čišćenje šumskih kultura i šuma,
 - zaštita šuma od uzročnika biljnih bolesti i štetočina,
 - prorjeđivanje sastojina,
 - sanacija požarišta,
 - zaštita šuma od protupravnog prisvajanja,
 - proizvodnju šumskog sjemena i šumskog sadnog materijala,
 - održavanje šumskih puteva,
 - te druge mjere i aktivnosti s ciljem osiguranja trajnosti gospodarenja šumama.
- (4) Proširena biološka reprodukcija podrazumijeva provođenje biotehničkih mjera za povećanje površina visokih šuma i unapređenje stanja šuma u pogledu veličine i kvaliteta zaliha i njihove proizvodnosti ili unapređenje i izgradnju nove infrastrukture za trajno - održivo gospodarenje šumama.
- (5) Pod proširenom reprodukcijom podrazumijeva se:
- ulaganje u rekonstrukciju degradiranih i izdanačkih šuma,
 - projektovanje, rekonstrukcija i izgradnja nove šumarske infrastrukture,
 - certificiranje gospodarenja šumama,
 - kupovina zemljišta u svrhu podizanja novih šuma uključujući i podizanje plantaža brzorastućih vrsta drveća,
 - pošumljavanje goleti i krša,
 - unaprjeđenje lovstva,
 - unaprjeđenje opštekorisnih funkcija šuma i
 - naučno istraživački rad i stručno obrazovanje kadrova iz djelokruga rada šumarstva.
- (6) Planirani obim biološke reprodukcije šuma u šumsko privrednim osnovama mora biti usklađen sa kantonalnim šumsko-razvojnim planom."

Član 7.

(Izmjena člana 16.)

Član 16. mijenja se i glasi:

"Član 16.

(Tehnički prijem radova)

- (1) Za izvedene radove po projektu za izvođenje vrši se tehnički prijem radova, a najkasnije u roku od tri mjeseca od okončanja radova ili šest mjeseci ako su radovi završeni u zimskom periodu (novembar-april).
- (2) Tehnički prijem radova pošumljavanja vrši se poslije dvije godine od završetka njihovog izvođenja.
- (3) Komisiju za tehnički prijem izvedenih radova po projektu za izvođenje (u daljem tekstu člana: Komisija) u državnim šumama formira korisnik šuma, a za privatne šume Uprava za šumarstvo ili pravno lice za obavljanje stručnih poslova u privatnim šumama.
- (4) Ako se prilikom tehničkog prijema utvrdi da radovi nisu izvršeni u skladu sa projektom za izvođenje, izvođač radova je dužan utvrdene nedostatke otkloniti i radove izvršiti u roku koji odredi Komisija. Nakon isteka roka Komisija vrši ponovni pregled.

- (5) O izvršenom tehničkom prijemu izvedenih radova, Komisija sačinjava zapisnik u kojem se obavezno konstatuje uspjeh, obim i kvalitet izvršenih radova po projektu za izvođenje.
- (6) Primjerak zapisnika Komisije dostavlja se u roku od osam dana od dana završetka pregleda šumarskoj inspekciji.
- (7) Svi izvršeni radovi i nalaz Komisije obavezno se evidentiraju u registar evidencije koji će pravilnikom propisati Ministar.
- (8) Ministar će donijeti uputstvo za tehnički prijem radova kojim će biti definisan i sastav Komisije."

Član 8.

(Izmjena člana 18.)

Član 18. mijenja se i glasi:

"Član 18.

(Zabrana čistih sječa i drugih oblika pustošenja šuma)

- (1) Zabranjene su čiste (gole) sječe na velikim površinama i drugi oblici pustošenja šuma koje:
 - a) trajno smanjuje produktivni potencijal šumskog zemljišta,
 - b) trajno i znatno ugrožavaju hidrološki režim šumskog zemljišta,
 - c) posredno uzrokuju pojavu erozije šumskog tla sa većim negativnim posljedicama,
 - d) ugrožavaju vršenje neke od funkcija šuma na duži period,
 - e) ugrožavaju šumski biodiverzitet.
- (2) Izuzetno čiste sječe po skupinama do 1 ha (malim površinama) mogu biti izvršene u slučajevima pripreme šumsko uzgojnih zahvata s ciljem unapređenja šumskih sastojina u mjeri koja je planirana šumsko privrednom osnovom. U jednoj sastojini može biti više skupina ali nijedna ne može biti veća od 1 ha, i sumarno ne mogu biti veće od 25% površine cijele sastojine (odsjeka).
- (3) U izuzetnim slučajevima čista sječa šuma može se primijeniti i na većim površinama od 1 ha ako je neophodna zbog sanitarnih razloga, provođenja preventivnih zaštitnih mjera ili direktne konverzije izdanačkih šuma uz saglasnost Uprave za šumarstvo."

Član 9.

(Izmjena i dopuna člana 24.)

- (1) U članu 24. u stavu (1) iza riječi: "međama" poslije zarezu dodaju se riječi: "vodnom pojasu,".
- (2) Stav (6) mijenja se i glasi:
- "(6) Privremeno oduzimanje drveta i nedrvenih šumskih proizvoda (zapljena) koji su stavljeni u promet u suprotnosti sa odredbama ovog člana vrše čuvari šuma, pripadnici policije i šumarski inspektor, dok privremeno oduzimanje sredstava kojima je izvršena nezakonita radnja vrše pripadnici policije u skladu sa važećim propisima koji se odnose na krivičnu, odnosno prekršajnu odgovornost. Privremeno oduzeti šumski proizvodi pohranjuju se na mjestu koje odredi KJP "Sarajevo - šume" d.o.o. Sarajevo. U slučaju da postoji mogućnost da se u toku pohranjivanja šumskim proizvodima ili sredstvima umanji vrijednost, zaplijenjenu robu licitacijom će prodati KJP "Sarajevo - šume" d.o.o. Sarajevo, a finansijska sredstva deponovati na poseban račun do okončanja sudskog postupka."

Član 10.

(Izmjena člana 25.)

Član 25. mijenja se i glasi:

"Član 25.

(Opći principi)

- (1) Da bi se obezbijedila zaštita ili poseban režim gospodarenja šumama, određene šume mogu biti proglašene šumama s posebnom namjenom. Njima će se gospodariti na način koji će obezbijediti namjenu zbog koje su proglašene šumama s posebnom namjenom.
- (2) Procjena funkcija šuma s posebnom namjenom utvrđuje se stručnim šumarskim elaboratom sa podacima o stanju šuma i principima gospodarenja šumama u cilju očuvanja šuma i ostvarivanja namjene proglašenja područja, a koristi se za proglašenje iz stava (1) ovog člana. Šume koje predstavljaju dio područja zaštićenog propisom donesenim u skladu sa drugim zakonom Federacije, koji također propisuje poseban režim gospodarenja za šume, smatraju se šumama s posebnom namjenom.
- (3) Način gospodarenja i obnove šuma unutar zaštićenog područja propisuje se programom za gospodarenje šumama, u skladu sa svrhom radi koje su proglašene i na način određen aktom o njihovom proglašenju. Troškove gospodarenja šumama unutar zaštićenog područja snosi pravno lice na čiji je zahtjev proglašenje izvršeno.
- (4) Propis kojim se šume proglašavaju šumama s posebnom namjenom određuje režim gospodarenja takvim šumama, izvršioca propisanog režima kao i pravno lice koje je odgovorno za obezbjeđenje sredstava za pokriće troškova vezanih za posebni režim gospodarenja. Vlasnik/korisnik šume ima pravo na naknadu za ograničeno korištenje ili povećane troškove gospodarenja. Naknadu snosi pravno lice na čiji je zahtjev proglašenje izvršeno. Visina naknade se utvrđuje sporazumno, a ako se sporazum ne postigne naknada se utvrđuje kod nadležnog suda.
- (5) Šume s posebnom namjenom moraju se ucrtati na kartu i na terenu obilježiti vidljivim znakovima koji se odrede u propisu o proglašenju šume. Šume će biti predmet nadzora šumarskog inspektora bez obzira na tijelo koje je izvršilo proglašenje. Obilježavanje šuma vrši pravno lice koje upravlja zaštićenim područjem. Troškove obilježavanja snosi pravno lice na čiji je zahtjev šuma proglašena šumom sa posebnom namjenom.
- (6) Ministarstvo vodi evidenciju šuma sa posebnom namjenom."

Član 11.

(Izmjena člana 26.)

Član 26. mijenja se i glasi:

"Član 26.

(Šume s posebnom namjenom)

- (1) Šume s posebnom namjenom su:
 - a) šume koje prvenstveno služe za zaštitu zemljišta na strmim terenima i zemljišta podložnih erozijama, bujicama, klizištima ili ostrim klimatskim uslovima koji ugrožavaju postojanje samih šuma,
 - b) šume čiji je glavni zadatak zaštita naselja, privrednih i drugih objekata kao što su saobraćajnice, energetske objekti, objekti telekomunikacione infrastrukture, zaštita izvorišta i korita vodotoka, obale vodenih akumulacija kao i šume koje su podignute kao zaštitni pojasevi, odnosno koje služe

- protiv prirodnih nepogoda, katastrofa ili stihijskih efekata ljudskog djelovanja,
- c) šume visoke zaštitne vrijednosti,
 - d) ogledne šume i ogledne plohe u cilju edukacije i naučnih istraživanja,
 - e) prirodni rezervati,
 - f) habitati rijetkih i ugroženih životinja,
 - g) medonosne šume i arboretumi,
 - h) šume ili njeni dijelovi registrovani kao sjemenske sastojine i sjemenski objekti,
 - i) šume od specijalnog značaja za pročišćavanje zraka i snabdijevanje vodom,
 - j) šume namijenjene za izletišta, odmor, opće obrazovanje, rekreaciju, turizam, klimatska i druga lječilišta.
- (2) Šume s posebnom namjenom iz stava (1) tač. a), b) c), d), e), f), g), i) i j) ovog člana proglašava Skupština Kantona na prijedlog Vlade, a šume iz stava (1) tačke h) ovog člana proglašavaju se šumama sa posebnom namjenom u skladu sa odredbama Zakona o sjemenu i sadnom materijalu šumskih i hortikulturnih vrsta drveća i grmlja ("Službene novine Federacije BiH", br. 71/05 i 8/10).
- (3) Primjerak akta o proglašenju šuma s posebnom namjenom obavezno se dostavlja Ministarstvu komunalne privrede, infrastrukture, prostornog uređenja, građenja i zaštite okoliša, Zavodu za planiranje razvoja Kantona Sarajevo, Zavodu za zaštitu kulturno historijskog i prirodnog naslijeđa Kantona Sarajevo i općini na čijem se području šuma s posebnom namjenom nalazi."

Član 12.

(Brisanje člana 27.)

Član 27. briše se.

Član 13.

(Izmjena člana 28.)

Član 28. mijenja se i glasi:

"Član 28.

(Zahtjev za proglašenje)

Zahtjev sa elaboratom za proglašenje šuma sa posebnom namjenom koji podnosi zainteresovana institucija ili pravno lice obavezno sadrži sljedeće:

- a) cilj i razloge zbog kojih se predlaže proglašenje šuma sa posebnom namjenom,
- b) općinu, naziv katastarske općine, broj zemljišnoknjižnog uloška i broj katastarske parcele, kao i naziv šumsko gospodarske jedinice, broj odjela i oznaku odsjeka,
- c) digitaliziranu kartu razmjere 1:10.000 (za manja područja razmjera 1:5.000), sa ucrtanim parcelama za koju se traži proglašenje šume sa posebnom namjenom,
- d) stručni šumarski elaborat sa podacima o stanju šuma i principima gospodarenja šumama u cilju očuvanja šuma i ostvarivanja namjene proglašenja područja posebne namjene,
- e) procjenu okolišnog uticaja,
- f) predložena ograničenja u gospodarenju,
- g) predložene naknade ukoliko one dođu u obzir,
- h) mišljenje općine,
- i) odgovarajuće administrativne mjere uključujući javne obavijesti i rasprave."

Član 14.

(Izmjene člana 30.)

- (1) U članu 30. u stavu (3) riječi: "Uprave za šumarstvo" zamjenjuju se riječima: "korisnika državnih šuma".
- (2) U stavu (4) riječi: "Uprava za šumarstvo je dužna" zamjenjuju se riječima: "korisnik državnih šuma je dužan".

Član 15.

(Izmjene član 34.)

- (1) U članu 34. stav (4) mijenja se i glasi:
- "(4) KJP "Sarajevo-šume" može za vlastite potrebe koristiti rastrešeni i nekompaktni kameni materijal na lokalitetima predviđenim šumsko privrednom osnovom i godišnjim planovima realizacije šumsko privredne osnove u svrhu izgradnje i održavanja šumskih puteva."
- (2) Stav (5) briše se.

Član 16.

(Dopuna člana 36.)

- U članu 36. iza stava (2) dodaje se novi stav (3) koji glasi:
- "(3) Radi zaštite biodiverziteta i mikrostaništa ugroženih vrsta izdvajaju se i registruju habitatna stabla u šumi čija je sječa i oštećivanje ili korištenje njihove drvene mase na bilo koji način zabranjeno."

Član 17.

(Izmjena člana 44.)

- U članu 44. u stavu (4) riječi: "koje su proglašene zaštitnim šumama ili šumama s posebnom namjenom" brišu se.

Član 18.

(Izmjena člana 46.)

Član 46. mijenja se i glasi:

"Član 46.

(Upravljanje privatnim šumama)

- (1) Privatne šume, u smislu ovog zakona, su sve šume i šumsko zemljište za koje je fizičko ili pravno lice upisano u zemljišne knjige kao vlasnik.
- (2) Privatnim šumama upravljaju i gospodare njihovi vlasnici u skladu sa ovim zakonom, podzakonskim propisima i odredbama šumsko privredne osnove.
- (3) Privatnu šumu dužan je čuvati vlasnik šume.
- (4) Vlasnik privatne šume ugovorom, prenosi obavljanje stručnih poslova kako je definisano ovim zakonom, Upravi za šumarstvu ili pravnom licu za obavljanje stručnih poslova u privatnim šumama.
- (5) Pod stručnim poslovima iz stava (4) ovog člana podrazumijevaju se doznaka, primanje, premjeravanje, evidentiranje, izdavanje otpremnog iskaza, planiranje šumsko-uzgojnih radova, stručni nadzor, stručni savjetodavni poslovi i zaštita šuma.
- (6) Uprava za šumarstvo ili pravno lice za obavljanje stručnih poslova u privatnim šumama dužni su voditi evidencije o izvršenim radovima i provedenim mjerama predviđenim kantonalnim šumsko-razvojnim planom, šumsko privrednom osnovom i projektom za izvođenje. Podaci predviđeni evidencijama moraju se evidentirati za proteklu godinu najkasnije do 28. februara tekuće godine.
- (7) Za privatne šume projekat za izvođenje izrađuje se u skladu sa članom 12. ovog zakona i donosi ga Uprava za šumarstvo ili pravno lice za obavljanje stručnih poslova u privatnim šumama.
- (8) Ministar donosi pravilnik kojim se propisuje način i oblik vođenja registra evidencija iz stava (6) ovog člana."

Član 19.

(Izmjena člana 47.)

Član 47. mijenja se i glasi:

"Član 47.

(Zaključivanje ugovora)

- (1) Na području Kantona posluje KJP "Sarajevo-šume".
- (2) Ministarstvo ugovorom prenosi poslove gospodarenja državnim šumama iz člana 41. stav (1) na KJP "Sarajevo-šume", izuzev šuma koje su posebnim propisom povjerene na upravljanje KJU za zaštićena područja.
- (3) Prava, zadaci i odgovornosti iz stava (2) ovog člana koje Ministarstvo ugovorom prenosi na KJP "Sarajevo-šume" pored ostalog sastoje se iz:
 - a) čuvanja šuma i šumskog zemljišta u državnom vlasništvu putem organizovane čuvarske službe,
 - b) realizacije šumsko privredne osnove i izrade i realizacije projekata za izvođenje,
 - c) projektovanja, izgradnje, rekonstrukcije i održavanja šumske infrastrukture,
 - d) prometa šumskih drvnih sortimenata i nedravnih šumskih proizvoda,
 - e) izvršavanja programa i planova biološke reprodukcije šuma propisanih šumsko privrednom osnovom,
 - f) provođenja mjera integralne zaštite šuma u skladu sa ovim zakonom,
 - g) proizvodnje i prometa šumskog sjemena, šumskog i hortikulturnog sadnog materijala,
 - h) izvršavanja planova korištenja nedravnih šumskih proizvoda,
 - i) realizacije planova razvoja šumarstva i mjera racionalizacije u šumarstvu,
 - j) realizacije aktivnosti predviđenih izvedbenim dijelom kantonalnog šumsko-razvojnog plana,
 - k) svih ekonomskih odgovornosti, koristi i odluka,
 - l) dostavljanja mjesečnih izvještaja o provedenim aktivnostima na čuvanju šuma koji sadržava evidenciju bespravih sječa,
 - m) ostalih poslova, zadataka i odgovornosti u skladu sa ugovorom o prenosu poslova gospodarenja.
- (4) KJP "Sarajevo-šume" donosi cjenovnik šumskih proizvoda uz prethodnu saglasnost Ministarstva. KJP "Sarajevo-šume" dužno je cjenovnikom obuhvatiti sve proizvode koji se plasiraju na tržište iz šume i sa šumskog zemljišta.
- (5) Vlada će donijeti Odluku o uslovima i načinu prodaje šumskih drvnih sortimena i nedravnih šumskih proizvoda.
- (6) Ministarstvo prati realizaciju ugovorenih obaveza iz stava (2) ovog člana."

Član 20.

(Izmjena člana 49.)

U članu 49. riječi: "iz člana 46. stav (5)" zamjenjuju se riječima: "iz člana 47. stav (4)".

Član 21.

(Izmjene i dopune člana 52.)

- (1) U članu 52. u stavu (2) riječi: "planom prostornog uređenja", zamjenjuju se riječima: "prostornim planom Kantona i/ili drugim planskim dokumentom u smislu odredbi Zakona o prostornom uređenju Kantona Sarajevo ("Službene novine Kantona Sarajevo", br. 24/17 i 1/18)."
- (2) U stavu (5) tačka d) mijenja se i glasi:

"d) rješenje Federalnog ministarstva okoliša i turizma o odobrenju studije o procjeni uticaja na okoliš u slučaju utvrđene obaveze provođenja procjene uticaja na okoliš ili rješenje Federalnog ministarstva okoliša i turizma da na osnovu predhodne procjene uticaja na okoliš nije potrebno dalje provođenje procjene uticaja,".

- (3) U stavu (5) u tački f) riječ: "saglasnost" zamjenjuje se riječima: "vodni akt izdat od".
- (4) Iza stava (11) dodaju se novi st. (12) i (13) koji glase:

"(12) Šuma i šumsko zemljište, a kojem je planom prostornog uređenja predviđena druga namjena, smatra se šumom i šumskim zemljištem sve dok se ne privede svojoj konačnoj namjeni odnosno sve dok rješenje kojim se daje konačna saglasnost za krčenje šume odnosno promjenu namjene šumskog zemljišta ne postane konačno.
- (13) Izuzetno od st. (1), (2) i (4) ovog člana, radi izgradnje spomen obilježja maksimalne površine do 200 m², zahtjev za krčenje šume može podnijeti općina na čijem području se planira gradnja, a uz zahtjev se prilažu akti iz stava (5) tač. b), d), e) i f) ovog člana i urbanistička saglasnost za gradnju objekta."

Član 22.

(Izmjena člana 55.)

Član 55. mijenja se i glasi:

"Član 55.

(Pravo služnosti na državnoj šumi i šumskom zemljištu)

- (1) Na šumi i šumskom zemljištu u državnom vlasništvu može se osnovati pravo služnosti u svrhu:
 - a) izgradnje vodovoda,
 - b) izgradnje kanalizacije,
 - c) izgradnje plinovoda,
 - d) izgradnje električnih vodova,
 - e) služnosti puta,
 - f) izgradnje naftovoda,
 - g) skladištenja prirodnog plina,
 - h) trajnog zbrinjavanja ugljikovog dioksida,
 - i) obavljanja turističke djelatnosti,
 - j) izgradnje infrastrukturnih građevina neposredno povezanih s radom proizvodnog postrojenja, sportsko rekreacijskog turizma i
 - l) izgradnje i održavanja infrastrukture (regulacijskih i zaštitnih vodnih građevina, komunalnih vodnih građevina, vodnih građevina za melioracije, vodnih građevina za proizvodnju električne energije, plinovoda, električnih i ostalih vodova, kao i u svrhu druge vrste infrastrukture - komunalne, prometne, energetske, meteorološke i slične infrastrukture).
- (2) Na šumi i šumskom zemljištu u državnom vlasništvu pravo služnosti u svrhu obavljanja turističke djelatnosti ili sportsko rekreacijskog turizma može se osnovati samo za potrebe paintball/laser tag borilišta, adrenalinskog parka, tematskog parka, staza i šetnica kroz šumu, ograđenih ili neograđenih površina za jahanje konja za turističke svrhe, biciklističkih staza, poletnih staza (padobransko jedrenje, zmajarenje i sl.), ski staza, zipline, šetnje u krošnjama, vidikovaca i promatračnica, površina za slobodno penjanje i sportskog streljaštva.
- (3) Pravo služnosti u svrhu obavljanja turističke djelatnosti i sportsko rekreacijskog turizma iz stava (2) ovog člana

može se osnovati samo uz saglasnost Skupštine Kantona Sarajevo.

- (4) Ugovor kojim se osniva služnost na šumi i šumskom zemljištu u državnom vlasništvu zaključuje se između lica u čiju se korist osniva pravo služnosti s jedne strane i Ministarstva i KJP "Sarajevo-šuma" s druge strane.
- (5) Naknada koja se ostvaruje po osnovu služnosti iz stava (1) ovog člana uplaćuje se na depozitni račun Budžeta Kantona.
- (6) Lice u čiju korist se zasniva služnost obavezno je uplatiti naknadu iz člana 52. ovog zakona, bez provođenja procedure za krčenje šume.
- (7) Sredstva naplaćena po osnovu zakupa i prava služnosti mogu se koristiti isključivo u svrhu podizanja novih šuma i kupovinu šuma u skladu sa odredbama ovog zakona na području općine gdje je ostvaren prihod.
- (8) Vlada će donijeti Odluku o visini naknade za davanje šume i šumskog zemljišta u državnom vlasništvu u zakup i za osnivanje prava služnosti na šumi i šumskom zemljištu u državnom vlasništvu."

Član 23.

(Izmjena člana 57.)

Član 57. mijenja se i glasi:

"Član 57.

(Poslovi Uprave za šumarstvo)

- (1) Uprava za šumarstvo obavlja sljedeće poslove:
 - a) prikuplja i vodi bazu podataka o stanju i razvoju svih šuma, ustanovljava i vodi katastar šuma i šumskog zemljišta i katastar šumske infrastrukture u državnom i privatnom vlasništvu za područje Kantona,
 - b) priprema nacrt kantonalnog šumsko-razvojnog plana,
 - c) priprema i prati provođenje programa za realizaciju aktivnosti predviđenih kantonalnim šumsko-razvojnim planom,
 - d) provodi proceduru izrade, finansira, prati provedbu i vodi evidenciju važenja šumsko privrednih osnova za sve šume na području Kantona (državne i privatne šume),
 - e) pruža stručnu pomoć za izradu šumsko privrednih osnova,
 - f) obezbjeđuje nadzor na izradi šumsko privrednih osnova,
 - g) priprema i izrađuje programe iz oblasti šumarstva koji se finansiraju ili sufinansiraju iz namjenskih sredstava Budžeta Kantona,
 - h) utvrđuje i vodi registar i evidenciju objekata za proizvodnju i doradu šumskog sjemena i proizvođača šumskog i ukrasnog drveća i grmlja u Kantonu,
 - i) u saradnji sa korisnikom šuma prati zdravstveno stanje šuma, obavlja dijagnostno-prognozne poslove i prati stanje i stepen oštećenosti šuma,
 - j) u saradnji sa korisnikom šuma i nadležnim organom civilne zaštite izrađuje i u okviru svoje nadležnosti provodi programe integralne zaštite šuma i planove protivpožarne zaštite te vodi odgovarajuće baze podataka,
 - k) izrađuje podloge za programe razvoja šumarstva i obezbjeđuje podatke za potrebe prostornih planova

uz primjenu tehničkih normativa iz oblasti šumarstva;

- l) informiše i upoznaje javnost o stanju šuma i razvoju šumarstva te izdaje prigodne stručne publikacije o stanju šuma i njihovom značaju,
 - m) podržava i promovira naučno istraživačku djelatnost i transfer znanja iz oblasti šumarstva,
 - n) organizuje savjetovanja i pruža stručnu i savjetodavnu pomoć korisniku državnih šuma i vlasnicima privatnih šuma.
- (2) Uprava za šumarstvo priprema godišnji plan rada, finansijske planove i izvještaje o izvršenim radovima za Vladu."

Član 24.

(Izmjena člana 58.)

Član 58. mijenja se i glasi:

"Član 58.

(Čuvanje šuma)

- (1) KJP "Sarajevo-šume" dužne su obezbijediti neposrednu zaštitu državnih šuma i šumskog zemljišta iz člana 47. stav (2) ovog zakona, a odnosi se na čuvanje šuma od šumskih požara i drugih elementarnih nepogoda, biljnih bolesti i štetočina, bespravnog prisvajanja i korištenja, kao i drugih protivzakonitih radnji, putem organizovane čuvarske službe.
- (2) KJP "Sarajevo-šume" dužne su nadoknaditi štetu nastalu bespravnom sječom ako se utvrdi da KJP "Sarajevo-šume" odnosno osoba odgovorna za čuvanje državnih šuma nije evidentirala takvu bespravnu sječu i/ili nije podnijela odgovarajuću prijavu nadležnom tijelu za štetu nastalu na području koje je KJP "Sarajevo-šumama" dato na gospodarenje.
- (3) Šumarski inspektor donosi rješenje o naknadi štete iz stava (2) ovog člana koju su KJP "Sarajevo-šume" dužne platiti, a šteta se uplaćuje na namjenski račun Budžeta Kantona Sarajevo.
- (4) Čuvarska služba iz stava (1) ovog člana formira se unutar KJP "Sarajevo-šuma" po određenim čuvarskim reonima. Čuvarsku službu obavljaju čuvari šuma koje za to ovlasti KJP "Sarajevo-šume".
- (5) Čuvari šume mogu biti lica koja su završila srednju šumarsku školu III ili IV stepen, koja ispunjavaju uslove za nošenje oružja.
- (6) Čuvari šuma su ovlaštene službene osobe.
- (7) Čuvari šuma službu obavljaju u uniformi, moraju biti naoružani i moraju posjedovati dokument - legitimaciju čuvara šuma kojim potvrđuju status čuvara šuma. Legitimaciju imaju i druga stručna lica koja imaju ovlaštenje za poslove zaštite šuma.
- (8) Čuvari šume dužni su da:
 - a) čuvaju šumu od šumskih požara na način kako je utvrđeno ovim zakonom i planovima zaštite šuma od požara,
 - b) čuvaju šumu i šumska zemljišta u vlasništvu države od bespravnog zauzimanja i korištenja, od nezakonitih sječa, sprječavaju bespravnu izgradnju u šumi i na šumskim zemljištima,
 - c) evidentiraju nezakonito posječena stabla u propisane obrasce, obrojčavaju ih i žigošu šumskim čekićem šumske štete,

- d) prate pojave i kretanje biljnih bolesti i štetočina i štete nanese šumi od divljači,
 - e) prate stanje divljači,
 - f) prate održavanje šumskog reda,
 - g) sprječavaju nezakonito pokretanje drveta iz šume, ubiranje i sakupljanje nedrvenih proizvoda i stavljanje istih u promet,
 - h) zaustave prijevozna sredstva i pregledaju prateću dokumentaciju za prijevoz drvnih i nedrvenih šumskih proizvoda na šumskim, lokalnim i regionalnim putevima koji prolaze kroz dijelove i/ili komplekse šume i šumskog zemljišta i vrše kontrolu klasiranja drvnih proizvoda u skladu sa važećim standardima,
 - i) kontrolišu porijeklo drveta u pogonima za preradu drveta i na svim drugim mjestima gdje se drvo skladišti,
 - j) pregledaju sav transport na šumskim putevima,
 - k) spriječe istresanje, deponovanje i odlaganje smeća i drugog otpada u šumi i uništavanje graničnih znakova,
 - l) sačine zapisnik o protivpravnoj radnji sa neophodnim podacima o izvršenoj radnji, izvršiocima i visini štete,
 - m) legitimišu sva lica zatečena u vršenju prekršajnih radnji po ovom zakonu i krivičnih djela koja se odnose na šume ili za koja postoji osnovana sumnja da su izvršila takva djela, ako se ne može utvrditi identitet tih lica na drugi način,
 - n) poduzmu mjere da bi se sačuvali tragovi krivičnog djela, predmeti na kojima je ili pomoću kojih je učinjeno krivično djelo i drugi dokazi o njima i
 - o) obavijeste policijsku upravu i nadležnu šumarsku inspekciju o svim zapaženim nepravilnostima.
- (9) Za sve nezakonite aktivnosti u skladu sa svojim dužnostima iz stava (8) ovog člana, čuvar šuma obavezan je bez odlaganja sačiniti zapisnik o protivpravnoj radnji sa neophodnim podacima i izdati prekršajni nalog, odnosno putem KJP "Sarajevo-šuma" podnijeti zahtjev nadležnom sudu za pokretanje prekršajnog postupka kada izdavanje prekršajnog naloga nije moguće ili pisane prijave nadležnom tužilaštvu za nezakonitu aktivnost koja ima obilježje krivičnog djela. Na sadržaj, izgled, način izdavanja i vođenja evidencija izdanih prekršajnih naloga primjenjuju se odredbe Zakona o prekršajima ("Službene novine Federacije BiH", broj 63/14).
- (10) Svako lice je dužno da na zahtjev čuvara šuma pokaže lične isprave kojim se utvrđuju njegov identitet i isprave za drvo i ostale šumske proizvode u prevozu ili uskladištene, kao i da na zahtjev čuvara šuma drvo ili nedrvne proizvode stavljenе u promet u suprotnosti sa članom 24. ovoga zakona ostavi na licu mjesta ili preveze na određenu lokaciju radi skladištenja istih.
- (11) Ministar donosi Pravilnik o načinu izvršavanja zadataka, obliku i sadržaju legitimacije čuvara šuma, izgledu uniforme i općim kriterijima za utvrđivanje čuvarskih reona."

Član 25.

(Izmjena člana 59.)

Član 59. mijenja se i glasi:

"Član 59.

(Novčana sredstva i izvori)

- (1) Radi ostvarivanja općeg interesa i dugoročnih ciljeva zasnovanih na principima održivog gospodarenja šumama i šumsko privrednim osnovama ustanovljavaju se novčana sredstva za zaštitu i unapređenje stanja postojećih i podizanja novih šuma i za ruralni razvoj.
- (2) Novčana sredstva iz stava (1) ovog člana čine:
 - a) naknade za korištenje državnih šuma iz čl. 49. i 60. ovog zakona,
 - b) naknade iz člana 52. stav (8) ovog zakona,
 - c) naknade iz člana 54. stav (5) ovog zakona,
 - d) naknade iz člana 55. stav (3) ovog zakona,
 - e) ostali izvori u skladu sa ovim zakonom i drugi izvori.
- (3) Pored sredstava iz stava (2) ovog člana, novčana sredstva iz stava (1) ovog člana čine i namjenska sredstva za zaštitu i unapređenje stanja šuma, a koja se obezbjeđuju u Budžetu Kantona Sarajevo (u daljem tekstu: Budžet) za svaku kalendarsku godinu.
- (4) Sredstva iz stava (2) ovog člana, osim dijela sredstava iz tačke a) koja pripada općini, uplaćuju se na depozitni račun Budžeta Kantona, a sredstva koja pripadaju općini uplaćuju se na depozitni račun za prikupljanje javnih prihoda općine.
- (5) Sredstvima sa posebnih računa iz stava (4) ovog člana raspolaže Ministar i općinski načelnik.
- (6) Uplata prihoda iz stava (2) ovog člana, od tač. a) do e) vrši se u skladu sa propisima Federalnog ministarstva finansija o načinu uplate javnih prihoda budžeta i vanbudžetskih fondova na području Kantona."

Član 26.

(Izmjena člana 61.)

Član 61. mijenja se i glasi:

"Član 61.

(Visina namjenskih sredstava)

Iznos namjenskih sredstava iz člana 59. stav (3) ovog zakona obezbjeđuje se iz Budžeta u visini od 0,5% do 2% od poreznih i neporeznih prihoda utvrđenih Budžetom za prethodnu godinu."

Član 27.

(Izmjena člana 62.)

U članu 62. stav (1) mijenja se i glasi:

- "(1) Iz novčanih sredstava iz člana 59. stav (1) ovog zakona finansira i/ili sufinansira se:
 - a) izrada i revizija kantonalnog šumsko-razvojnog plana,
 - b) izrada šumsko privrednih osnova za državne i privatne šume,
 - c) nadzor nad prikupljanjem podataka za izradu šumsko privrednih osnova za državne i privatne šume,
 - d) obnova šuma od posljedica elementarnih nepogoda, prenamnoženja insekata, požara i slično,
 - e) unapređenje proizvodnje šumskog reprodukcionog materijala,
 - f) očuvanje i unapređenje bioraznolikosti šumskih ekosistema,
 - g) proširena biološka reprodukcija šuma u obimu većem od onog koji je predviđen šumsko

- privrednom osnovom iz člana 15. stav (5) ovog zakona,
- h) uvođenje ekološko prihvatljivih tehnologija u procesu gospodarenja šumama,
 - i) provođenje procesa deminiranja šuma i šumskog zemljišta,
 - j) i drugi projekti iz oblasti šumarstva koji su u funkciji ruralnog razvoja."

Član 28.

(Izmjena člana 67.)

U članu 67. u stavu (1) tačka h) mijenja se i glasi:

"h) kontroliše zaštitu šuma iz člana 58. stav (8) ovog zakona koje provode KJP "Sarajevo-šume" putem čuvara šume,".

Član 29.

(Izmjene i dopune člana 70.)

- (1) U članu 70. u stavu (1) tač. 4., 5. i 8. mijenjaju se i glase:
 - "4. dozvoli izradu projekta licu koje ne ispunjava uslove iz člana 12. stav (5),
 - 5. ne izradi i ne donese projekat za izvođenje i ne odredi lice za realizaciju projekta (član 12. st. (4) i (11)),
 - 8. ne obavlja poslove biološke reprodukcije šuma (član 15. st. (1) i (3))."
- (2) U stavu (1) iza tačke 17. dodaju se nove tač. 18. i 19. koje glase:
 - "18. ne formira čuvarsku službu i/ili ne vrši zaštitu šuma (član 58. st. (1) i (4)),
 - 19. ne obavlja poslove iz člana 58. stav (8)."
- (3) Stav (2) mijenja se i glasi:
 - "(2) Za prekršaje iz stava (1) ovog člana, izuzev za prekršaj iz tačke 19., kaznit će se novčanom kaznom u iznosu od 2.500 do 3.000 KM i odgovorno lice u pravnom licu."
- (4) Iza stava (2) dodaje se novi stav (3) koji glasi:
 - "(3) Za prekršaje iz stava (1) tačka 19. ovog člana, kaznit će se novčanom kaznom u iznosu od 500 do 2.500 KM i odgovorno lice u pravnom licu."

Član 30.

(Izmjena člana 72.)

U članu 72. stav (1) mijenja se i glasi:

- "Novčanom kaznom u iznosu od 5.000 do 10.000 KM kaznit će se za prekršaj korisnik šuma ili drugo pravno lice ako:
- 1. vrši radove bez saglasnosti Uprave za šumarstvo (član 11. st. (3) i (4)),
 - 2. ne dostavi godišnji plan gospodarenja (član 11. st. (3) i (5)),
 - 3. ne ispoštuje odredbe projekta iz člana 12. stav (1),
 - 4. izvrši sječu izdvojenih i obilježenih habitatnih stabala iz člana 12. stav (3),
 - 5. dozvoli da projekat realizuje lice koje ne ispunjava uslove iz člana 12. stav (11),
 - 6. u roku od dvije godine ne izvrši radove predviđene projektom za izvođenje i ne vodi registar projekata (član 12. st. (4) i (13)),
 - 7. ne izvrši obilježavanje površina za sječu (član 13. stav (1)),
 - 8. izvrši doznaku stabala suprotno članu 13. stav (2),
 - 9. angažuje lice u doznaci stabala koje ne ispunjava uslove iz člana 13. stav (3),
 - 10. ne izvrši doznaku stabala u skladu sa Pravilnikom iz člana 13. stav (10),

- 11. ne izvrši tehnički prijem radova i ostale obaveze u skladu sa članom 16.,
- 12. ne obezbijedi mjere zaštite u skladu sa članom 17. stav (2),
- 13. ne izvrši pošumljavanje sječina u roku od dvije godine i ne ucrtta na karti i obilježi na terenu površine za prirodnu obnovu (član 19. st. (1) i (3)),
- 14. ne poštuje principe i mjere iz člana 21. stav (2),
- 15. ne očuva staništa iz člana 21. stav (3),
- 16. ako ne provodi ili obezbijedi provođenje sanitarne sječe i ne uspostavi i održava šumski red (član 22. st. (1) do (6)),
- 17. ako ne postupi u skladu sa članom 22. stav (7),
- 18. ne izradi plan u skladu sa članom 23. stav (1),
- 19. pokreće drvo, dijelove stabala i grane ili stavlja u promet drvo koje nije žigosano i snabdjeveno otpretnim iskazom (član 24. st. (1) i (5) tačka a)),
- 20. stavlja u promet nedrvne šumske proizvode bez odobrenja i otpretnog iskaza (član 24. st. (3) i (5) tačka b)),
- 21. u periodu vegetacije od 01. aprila do 01. novembra, drvo četinara i brijesta uskladištava i stavlja u promet suprotno članu 24. stav (7),
- 22. ne gospodari šumama sa posebnom namjenom shodno aktu o proglašenju i ne obilježi zaštitne šume i šume sa posebnom namjenom vidljivim znakovima (član 25. st. (3) i (5)),
- 23. ne postupi u skladu sa članom 29. stav (2),
- 24. vrši ili dozvoli pašu, žirenje, brst, kresanje lisnika (član 32. st. (1) i (2)),
- 25. vrši ili dozvoli sječu pančičeve omorike, tise, mečije lijeske, planinskog javora, planinskog bora, zelene johe, munike i zanovijeti suprotno odredbama člana 36.,
- 26. odobri korištenje šumskog puta suprotno odredbama člana 38. st. (1), (2) i (3),
- 27. vrši kretanje motornim vozilima u šumama i na šumskim zemljištima suprotno članu 38.,
- 28. u šumama vrši radnje suprotno članu 39. stav (2),
- 29. počini ili dopusti neovlašteno zauzimanje šuma ili šumskog zemljišta (član 43.),
- 30. ne vodi evidencije o izvršenim radovima i provedenim mjerama predviđenim kantonalnim šumsko-razvojnim planom, šumsko privrednom osnovom, godišnjim planom gospodarenja i projektima za izvođenje i ne evidentira ih u predviđenom roku (član 48. st. (1) i (2)),
- 31. u roku od dvije godine zemljište ne privede namjeni radi koje je krčenje izvršeno ili ne izvrši njegovo pošumljavanje (član 52. stav (6))."

Član 31.

(Izmjene člana 73.)

- (1) U članu 73. u stavu (1) riječi: "Novčanom kaznom u iznosu od 200 KM do 1.500 KM", se zamjenjuje riječima: "Novčanom kaznom u iznosu od 400 KM do 2.000 KM".
- (2) U stavu (1) tačka 2. mijenja se i glasi:
 - "2. ne izvrši radove predviđene projektom u roku (član 12. stav (4))."
- (3) U stavu (1) u tački 13. riječi: "zaštitnim šumama i", brišu se.

Član 32.

(Novi član 77a.)

Iza člana 77. dodaje se novi član 77a. koji glasi:

"Član 77a.

(Preuzimanje zaposlenika)

- (1) KJP "Sarajevo-šume" dužne su od dana početka primjene ovog zakona, čuvare šuma koji su bili zaposleni u Upravi za šumarstvo na poslovima neposredne zaštite šuma preuzeti i rasporediti bez javnog oglašavanja, a u skladu sa njihovom stručnom spremom i radnim iskustvom.
- (2) O preuzimanju čuvara šume iz stava (1) ovog člana zaključit će se sporazum između Ministarstva i KJP "Sarajevo-šuma".
- (3) Vlada će donijeti odluku o prenosu imovine u vlasništvu Kantona Sarajevo koja je potrebna za obavljanje poslova neposredne zaštite šuma od strane KJP "Sarajevo-šume".

Član 33.

(Izmjena člana 78.)

Član 78. mijenja se i glasi:

"Član 78.

(Donošenje podzakonskih akata)

- (1) Vlada će u roku od šest mjeseci od dana stupanja na snagu ovog zakona donijeti:
 - a) Odluku o uslovima i načinu prodaje šumskih drvnih sortimena i nedravnih šumskih proizvoda iz člana 47. stav (5) ovog zakona,
 - b) Odluku o visini naknade za davanje šume i šumskog zemljišta u državnom vlasništvu u zakup i za osnivanje prava služnosti na šumi i šumskom zemljištu u državnom vlasništvu iz člana 55. stav (6) ovog zakona,
 - c) Odluku o prenosu imovine u vlasništvu Kantona Sarajevo koja je potrebna za obavljanje poslova neposredne zaštite šuma od strane KJP "Sarajevo-šume" iz člana 77a. stav (3) ovog zakona.
- (2) Ministarstvo će u roku od šest mjeseci od dana stupanja na snagu ovog zakona izvršiti izmjene i dopune podzakonskih akata Zakona u skladu sa odredbama ovog zakona.
- (3) Ministar će u roku od jedne godine od dana stupanja na snagu ovog zakona donijeti sljedeće podzakonske akte:
 - a) Pravilnik kojim se propisuju elementi izrade, sadržaja i minimalnih uslova za izradu i donošenje kantonalnog šumsko-razvojnog plana iz člana 6. stav (7) ovog zakona,
 - b) Pravilnik kojim se propisuje sadržaj i postupak donošenja projekta za izvođenje gospodarenja šumama iz člana 12. stav (14) ovog zakona,
 - c) Uputstvo za tehnički prijem radova kojim će biti definisan sastav komisije za tehnički prijem izvedenih radova po projektu za izvođenje iz člana 16. stav (8) ovog zakona,
 - d) Pravilnik kojim se propisuje način i oblik vođenja registra evidencija iz člana 46. stav (6) ovog zakona,
 - e) Pravilnik o načinu izvršavanja zadataka, obliku i sadržaju legitimacije čuvara šuma, izgledu uniforme i općim kriterijima za utvrđivanje čuvarskih reona iz člana 58. stav (11) ovog zakona."

Član 34.

(Utvrđivanje prečišćenog teksta)

Ovlašćuje se Zakonodavno-pravna komisija Skupštine Kantona Sarajevo da utvrdi prečišćeni tekst Zakona o šumama Kantona Sarajevo u roku od šest mjeseci od dana stupanja na snagu ovog zakona.

Član 35.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo", a početak će se primjenjivati po isteku 90 dana od dana njegovog stupanja na snagu.

Broj 01-02-19325/22
09. maja 2022. godine
Sarajevo

Predsjedavajući
Skupštine Kantona Sarajevo
Elvedin Okerić, s. r.

Na osnovu člana 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - Ispravka, 3/96 - Ispravka, 16/97, 14/00, 4/01, 28/04, 6/13 i 31/17) i člana 20. Zakona o Agenciji za privatizaciju ("Službene novine Federacije BiH", br. 18/96, 2/02 i 110/12), Skupština Kantona Sarajevo, na 52. Radnoj sjednici održanoj dana 09.05.2022. godine, donijela je

ZAKON**O KANTONALNOJ AGENCIJI ZA PRIVLAČENJE
INVESTICIJA I PRIVATIZACIJU****I - OPĆE ODREDBE**

Član 1.

(Osnivanje)

Ovim zakonom osniva se Kantonalna agencija za privlačenje investicija i privatizaciju (u daljem tekstu: Agencija), utvrđuje njen pravni položaj, sjedište, djelatnost i nadležnost, upravljanje, rukovođenje i finansiranje.

**II - PRAVNI POLOŽAJ, SJEDIŠTE I POČETAK RADA
AGENCIJE**

Član 2.

(Pravni položaj)

- (1) Agencija ima svojstvo pravnog lica.
- (2) Agencija je specijalizovana organizacija Kantona Sarajevo (u daljem tekstu: Kanton).

Član 3.

(Sjedište)

Sjedište Agencije je u Sarajevu.

Član 4.

(Početak rada)

Agencija počinje sa radom danom imenovanja direktora.

III - DJELATNOST I NADLEŽNOST AGENCIJE

Član 5.

(Djelatnost Agencije)

Agencija vrši stručne i druge poslove i sa njima povezane upravne poslove utvrđene zakonima i drugim propisima, koji se odnose na podršku u privlačenju investicija, privatizaciju, koordinaciju i korištenje EU i drugih međunarodnih i domaćih fondova na nivou Kantona.

Član 6.

(Nadležnost u oblasti privlačenja investicija)

- (1) Agencija predstavlja centralno mjesto u Kantonu na koje se upućuju potencijalni i postojeći domaći i strani